

# **COMUNU DE CERÀXIUS**

***TZITADI METROPOLITANA DE CASTEDDU***

## **AVISU PÙBLICU PO AGATAI A IS COMPONENTIS DE SU NÙCLEU DE VALUTATZIONI**

### **SU DIRETORI DE S'ÀREA 04 AFARIS GENERALIS, ARRENDUS E CUNTRATUS**

Bius :

- su D. Lgs. n. 267/2000;
- su D. Lgs. n. 286/1999 chi at donau a is servìtzius de scrucullu de aintru o nùcleus de valutatzioni sa tarea de averiguai sa gestioni currigia e barata de is addonus pùblicos, sa impartzialidadi e su caminu profetosu de su traballu aministrativu;
- su D. Lgs. n. 150/2009 chi pertocat a sa otimizatzioni de sa produtividadi de su traballu pùblicu e de profetu e trasparèntzia de is aministratzionis pùbricas chi, a is artt. 7 e 14, at previdiu po is Entis Localis sa sceda de fai, in logu de su Nùcleu de valutatzioni, s'Organismu indipendenti de valutatzioni de sa performance cun tareas e responsabilidadis noas;
- sa Delibera CIVIT n.121 de su 9 de mes'e idas 2010 chi at previdiu po is Entis Localis sa sceda de podi scioberai si pompiai is Nùcleus de Valutatzioni in logu de s'Organismu Indipendenti de Valutatzioni;
- is articulus 13 e 14 de su Regulamentu vigenti de organizatzioni de is ufìtzius e de is servìtzius e de sa performance de sa Deliberatzioni de sa Giunta Comunali n. 123 de su 31 de mes'e idas 2010, cumentu mudada de ùrtimu de sa Deliberatzioni de sa Giunta Comunali n. 185 de su 21/10/2020, in sa parti aundi si cuncordant sa composidura e is funtzionis de su Nùcleu de valutatzioni, pensendi in manera particolari chi custu bèngiat numenau cun provedimentu de su Sindigu e siat furmau de tres componentis de aforas, de cussus unu cun funtzioni de Presidenti;

Donau àutu chi s'incàrrigu de s'Organismu Indipendenti de Valutatzioni de su Comunu de Ceràxius at a acabai in sa dii de su 9 de donniasanti 2020;

Donau àutu chi cun sa Delibera de sa Giunta Comunali 185/2020 s'Aministratzioni at scioberau de no impreai prus s'Organismu Indipendenti de Valutatzioni ma de apariciat su Nùcleu de Valutatzioni, mudendi po custa tarea is articulus 13 e 14 de su Regulamentu de organizatzioni de is ufìtzius e de is servìtzius e de sa performance;

Averiguau chi tocat fai sa nòmina de su Nùcleu de Valutatzioni po su triènniu chi intrat 2020-2023

## FAIT SCIRI

chi est stètiu apariciau unu sicoberu po agatai e affillai custu traballu de componenti de su Nùcleu de Valutatzioni furmau de su Presidenti e de n.2 componentis. Custu avisu pùblicu intzaras tenit sa tarea de fai presentai candidaduras po sa apariciadura de su Nùcleu de Valutatzioni.

### Art.1 - Ogetu de s'incàrrigu

Sa prestatzioni professionali ogetu de s'incàrrigu est de cumpriri totus is tareas e is impèrius previdius de s'art. 14 de su Regulamentu comunali po s'ordinamentu de is Ufitzius, de is Servitzius e de sa Performance.

A su Nùcleu de Valutatzioni funt donadas, po simplificai e no de manera cumpria, custas fainas:

- impelli, apoderai e assegurai su balori metodològicu de totu su sistema intreu de gestioni de sa performance, cumentu puru s'impreu suu de manera currìgia;
- apariciai e amostai a sa Giunta Comunali, po s'aprovatzioni, sa metodologia po sa graduatzioni de is posiduras apariciadoras e is baloris econòmicus alliongiaus de is pagamentus de posidura;
- proponni a sa Giunta sa definitzioni e s'adelantamentu de sa metodologia de valutatzioni de is Posiduras Organizativas e de su personali dipendenti chi sobrat, scrucullendiddi su funtzionamentu intreu, cuncordendi puru una Relata annuali apitzus de su stadu de su sistema, e a scoviai allestru a su Sindigu is strobis agataus;
- averigui s'arricidura e sa cumpridura de su sistema de valutatzioni permanenti de is Diretoris e de su personali dipendenti e de is sistemas de scrucullu internu cuforma a s'art. 147 e sighidoris de su D. Lgs. n° 267/2000;
- assegurai sa currigidura de is caminus de medida e de valutatzioni de sa Performance cumentu puru de s'impreu de is prèmius sighenid cussu chi est previdiu de su D. Lgs. nu 150/2009, de is cuntratus culletivus natzionalis e de su cuntratu integradori, arrespetendi s'allega de valorizatzioni de su merescimentu e de sa professionalidadi;
- fai e amostai a su Sindigu propònnidas po sa valutatzioni annuali de is Funtzionàrius Incarrigaus de Posidura Organizativa, alliongiadas a is tareas chistionadas in su Documentu Ùnicu de Programatzioni, averiguenti sa cumpridura bera de is tareas donadas, po podi donai su pagamentu de arresultau, sighendi cussu chi est stètiu scioberau de su sistema de medida e valutatzioni de sa performance po parti de s'Enti;
- fai sa valutatzioni de sa performance apariciadora de su Comunu e de is undiadis apariciadoras chi faint sa struttura amministrativa de s'Enti;
- cunfrimai sa Relata apitzus de sa Performance e ndi assegurai sa visibilitadi atruessu sa publicatzioni in su giassu istitutzionali de s'Aministratzioni;
- agiudai su Sindigu in sa valutatzioni de su Segretàriu;
- coidai dònna annu de sa rilevatzioni de sa valutatzioni de su Diretori cosa sua po parti de su personali;

- valutai sa economicidadi de sa gestiuni de is unidades organizativas a solas e de s'Enti totu intreu, scrucullendi is arresultaus de su scrucullu de gestiuni;
- si benit pediu, podit fai puru sa faina de agiudu a sa atividadi de scrucullu de gestiuni cunforma a s'art. 147 de su T.U.E.L.;
- cullaborai impari cun s'Aministratzioni e cun is Diretoris po amellorai s'organizatzioni e sa gestiuni de s'Enti;
- donai parris eventuali pedius de s'Aministratzioni apitzus de is allegas de sa gestiuni e su personali e de su scrucullu;
- averigui is arresultaus e is traballus profetosus de promovidura de is *pari opportunità*;
- cuncordai dònna annu, cun s'agiudu de sa struttura imbordigada, sa cumpridura de scrucullus in mesu a su personali dipendenti po podi cumprendi su tanti de biatzesa apariciadora e su tanti de cumpartzidura de su sistema de valutatzioni;
- amostai su parri cosa sua apitzus de su Còdixi de cumportamentu aziendali cumentu previdiu de s'articulu 54 de su D. Lgs. n° 165/2001 e ss.mm.ii.;
- billai apitzus de sa cumpridura sua e assegurai su coordinamentu intre is allegas de custu Còdixi e su sistema de medida e valutatzioni de sa performance;
- podit inditai, po allegas specificas o in generali, maneras e interbènnidas de averiguadura de su tanti de satisfadura de is impreadoris;
- relatai, cun s'igidura frima, cumentu costumau dònna tres mesis, a is Òrganus de pitzu de s'Aministratzioni apitzus de is arresultaus de su traballu fatu cun sa tarea de otimizai sa sceda amministrativa, agatai is cosas incollosas chi arrescint o atradant a sa lòmpidada de is tareas e chi crachint apitzus de sa gestiuni profetosa, acrarendi is logus de debilesa de is prestatzionis tentas, amostendi soluzionis organizadoras o mudàntzias e adelantamentus a su caminu de scrucullu e valutatzioni po amellorai s'organizatzioni intrea de s'Enti;
- fa totus is atras tareas previdias de sa lei, de su Statutu, de is regulamentus, de is cuntratus culletivus de traballu, lòmpius puru a pustis e sempri bàlidus, e fruniri a su Sìndigu dònna atru elementu profetosu chi ant podi pediri in is allegas alliongiadas a is tareas entregadas.

Su Sìndigu podit, in calisiat momentu, donai indiritzus e orientamentus a su Nùcleu de Valutatzioni, pediri sa cumpridura de fainas consultivas, cumentu puru pediri mudàntzias e aciuntas de impostatzionis metodològicas e prioridadi operativas.

## **Art. 2 - Tempus de sa càrriga**

Su Nùcleu de Valutatzioni sighit in càrriga po 3 8tres) annus cumintzendi de sa dii de sa nòmina e podit èssiri rennoau una borta sceti.

## **Art. 3 - Recuisitus personalis e professionalis**

Is requisitus pedius funt cumandaus de s'art. 14 de su Regulamentu comunali po s'ordinamentu de is Ufitzius, de is Servitzius e de is Performance, chi si amostant innoi asuta:

- Is componentis de su Nùcleu de Valutatzioni depint tenni una professionalidadi e una esperièntzia mannas meda, chi si podit agatai in su curriculum vitae de is candidaus,

in su siti de is materias allongiadas a su traballu pùblicu, a is allegas giuridicas e econòmicas de su personali de is Entis Localis e a is allegas apariciadoras e gestionalis.

- Po sa nòmina tocat a tenni su Diploma de Làurea de cuàturu annus, spetzialìstica o magistrali apitzus de allegas aziendalis, econòmicas, giuridicas o de ingegneria gestionali.
- Cunsiderendi sa mannesa de su Comunu de Ceràxiu e sa atividadi allongiada de medida e de valutatzioni, podint fai parti de su Nùcleu puru sugetus chi pigant parti a atrus nùcleus o organismus de valutatzioni.
- Is componentis de su Nùcleu de Valutatzioni no podint èssiri numenaus intre is sugetus chi:
  - a. siant stètius cundennaus, mancari cun sceda chi no est passada in giudicau, po is arreatus previdius de su Cabu I, Titulu II, de su Còdixi Penali;
  - b. tèngiant incàrrigus eletivus pùblicos, càrrigas in partidus politicus o in organizatzionis sindacalis (o chi tèngiant relatas sighias de cullaboratzioni o agiudu cun custas organizatzionis), o pur chi iant tentu incàrrigus o càrrigas simbillantis o chi iant tentu relatas simbillantis in is tres annus ainnantis de sa nòmina;
  - c. siant componentis de de is òrganus de guvernu cunforma a s'art. 36 de su D. Lgs. n° 267/2000 o apant tentu cussu incàrrigu in is tres annus ainnantis de su scioberu;
  - d. siant componentis de is Cunsillus de aministratzioni de is sotziedadis partitzipadas de s'Enti o apant tentu cussu incàrrigu in is tres annus ainnantis de sa nòmina;
  - e. apant relatas de coja, famìllia o acostiadura cun is cochnas mannas in servitziu in sìenti o cun sa conca manna politicu-aministrativa o, de dònna manera, cun s'òrganu de indiritzu politicu-aministrativu;
  - f. si cumprant is ipòtesis de incompatibilidadi previdias de is artt. 2382 e 2399, lit. a) e b) de su Còdixi Tzivili e is atras previdias de sa Lei.

#### **Art. 4 - Maneras de scioberu de su sugetu a su cali donai s'incàrrigu**

Su Nùcleu de Valutatzioni est numenau de su Sìndigu.

Is componentis funt agataus a pustis de sa valutatzioni de is curricula de is candidaus. S'incàrrigu afillau at a èssiri cuncordau de dònna manera cun unu provedimentu apòsitu, aundi ant a acrarai is trèminis e is maneras de cumpridura de su traballu, sighrndi is inditaduras de custu avisu. Su nòmini, su curriculum e su pagamentu de is componentis de su Nùcleu de Valutatzioni funt publicaus in su giassu Internet de su Comunu. Sa protzedidura de custu avisu no ocasionat sa apariciadura de nisciuna graduatòria.

#### **Art. 5 - Cumpensu**

Po is componentis est previdiu unu cumpensu ànnuo, scioberauy cun una Deliberatzioni apòsita de sa Giunta Comunale, po su tanti de € 6.612,00 donniunu, siat po su Presidenti e siat po is atrus duus componentis. Is pagamentus s'ant a fai a pustis de s'entrega de is faturas apòsitas.

## **Art. 6 - Maneras de presentada de is dimandas**

Is interessaus ant a depi presentai dimanda de partecipazioni a custa protzedidura, scriendi in paperi simpri, aundi assegurant is datus insoru, ponint is indirizus insoru, decrarant de tenni totus is requisitius pedius e chi no tenint arresonis de incompatibilitadi, cumentu puru sa cunfrima de àiri ligiu e agradèssiu totus is arrègulas chistionadas in custu avisu, e po acabai amostant a craru su permissu a su tratamentu de is datus frunius po is tareas de sa protzedidura de custu avisu cunforma a su Regulamentu UE 2016/679 de su 27 de abrilu 2016, cumentu si bit in su fac-simile alliongiau innoi.

A sa dimanda ant a depi allongiai:

- a) curriculum formativu e professionali de su candidau cun dii e firma;
- b) relata de acumpangiamentu de su curriculum;
- c) còpia fotostàtica de unu documentu de identidadi ancora bàlidu.

Is interessaus chi tenint totus is requisitius pedius, ant a podi presentai sa dimanda, cun totu sa documentatzioni inditada innoi asuba, a manu o puru cun su Servìtziu de Curreu, cun arregumandada A.R. a s'indirizu de su Comunu de Ceràxiu - Àrea 04 afaris Generalis, Arrendus, Cuntratus - aintu de sa de sexi dii a pustis de cussa de publicatzioni de custu bandu in s'Albu Pretòriu online e in su giassu internet de su Comunu de Ceràxiu, e prus a craru aintu de su 19/11/2020 a su Comunu de Ceràxiu, in bia Istria 1, o puru cun curreu eletrònicu certificau (PEC) a s'indirizu protocollo@pec.comune.selargius.ca.it.

In acontèssiu de imbiu a sa PEC de su Comunu, s'imbiu at a depi acontessi de casella de curreu eletrònicu certificau.

Sa dii profetosa po s'arricidura bàlida est cussa de arricidura chi bessit a foras de su sèlliu de s'Ufitziu Protocollo de custa Aministratzioni o de sa arricida donada de su sistema de curreu eletrònicu certificau.

Si acrarat chi no est bàlida sa dii de su sèlliu de curreu.

S'Aministratzioni at a podi ponni asuta de averiguadura cussu chi est stètiu decrarau de su candidau o pediri aprofundimentus e aciuntas.

## **Art. 7 - Arresonis de bogadura e incompatibilitadi.**

In prus de su poderiu fartau de is requisitius prevìdius po s'intrada, est una arresoni de bogadura de su scioberu:

- s'inditadura fartada de su nòmini, de su sangunau, residèntzia o domiciliu;
- sa inditadura fartada de sa seletzioni chi si bolit pigai parti;
- s'arricida po parti de su Comunu de sa dimanda apustis de su trèmini amostau innoi asuba;
- sa farta de una còpia de su documentu de identidadi ancora bàlidu;
- sa dimanda entregada po parti de sugetus chi no tenint is requisitius prevìdius de s'art. 3 de custu avisu;
- sa farta de curriculum professionali firmau cumenit si depit;

No podint èssir numenaus componentis de su Nùcleu de Valutatzioni is sugetus chi tèngiant incàrrigus pùblicos eligidoris o càrrigas in partidus polìticus o in organizatzionis sindacalis, o puru chi tèngiant relatas sighias de cullaboratzioni o de consulèntzia cun is organizatzionis numenadas ainnantis, o chi apant tentu relatas sighias in is tres annus ainnantis de s'incàrrigu.

No podint èssiri numenaus sugetus differentis de is personas fisicas. In prus, no podint fai parti de custu Nùcleu de Valutatzioni cussus chi funt in una de is cunditzionis avversadoras o cunflitu de interessus previdias de su puntu 3.5 de sa deliberatzioni Civit n.12/2013 e cussu chi funt in una de is cunditzionis previdias de s'art. 2382 de su Còdixi Tzivili (interditzioni, inabilitatzioni, faddimentu o cundenna a una pena chi ocasionat s'interditzioni, temporànea puru, de is ufitzius pùblicos o sa incapatzidadi de cumpriri ufitzius diretivus) o chi amostint incumpatibidadis sighendi is disposiduras de lei.

#### **Art. 8 - Informativa po s'amparu de su resguardu de is datus personalis**

Cunforma a su Regulamentu UE 2016/679 de su 27 de abrili 2016, e a pustis de sa procedura seletiva numenada innoi apitzus, si fait sciri chi is datus personalis ant a èssiri ogetu de tratamentu po parti de su Comunu de Ceràxius, arrespetendi su Regulamentu giai numenau, po is tareas istituzionalis imbordigaus cun sa atividadi de s'Enti, e in manera particolari po su cumprimentu de sa procedura cumenti puru de is cumpriduras sighidoras . Po informatzionis o po pinnigai una còpia intrea de s'avisu e is alliongias chi ddi pertocant, si depit tzerriai a s'Àrea 04 - Servitziu Segreteria Generali in bia Istria 1 in Ceràxius, a custus nùmerus:

Dot. Davide Maullu tel. 0708592253. e-mail [davide.maullu@comune.selargius.ca.it](mailto:davide.maullu@comune.selargius.ca.it)

Su testu de s'avisu e su fac-simile de dimanda benint publicaus in s'Albu Pretòriu de su Comunu de Ceràxius e in su giassu istituzionali [www.comune.selargius.ca.it](http://www.comune.selargius.ca.it) in sa setzioni Amministrazione Trasparente - bandi di gara e contratti - avvisi, bandi di gara e contratti di servizi e forniture sotto soglia comunitaria.

Ceràxius, 03/11/2020

**F.au Su Diretori de s'Àrea 04**  
**Dot.ssa Regina Vittone**